

永平府志卷六十五

列傳十七 忠烈

元

韓建字公懋遼西人至元中以宗正郎中知安慶潁六盜起所在守令多棄城走建治城隍計軍實示民必守與賊大小百餘戰皆敗之盜大忿乃悉眾來城南郭久隳為民居聯艦以為捍蔽盜縱火焚艦諸守將皆潰民走視建建方部署寮吏如平日民乃無恐且戰且撲盜轉西郭卻之東郭又卻之相火所經撤民屋材為柵盜無所利乃引去時余闕來戍郡道聞城

永平府志

卷六十五列傳

忠烈

一

陷矣比至乃完問故父老皆曰韓公完我及安慶為

陳友諒所陷建方臥病罵不屈求死甚急賊怒殺之

昇尸去葬南門外江邊

安慶府志案元史余闕傳闕同時死者建一家被害城中

民相率登城樓自捐其梯曰甯俱死此誓不從賊焚死者以千計

周宏字希道遷安人尹真定無極調遼陽甯昌俱有惠

政至正間調昌黎撫字有方利澤及人平章程思忠

亂據永平宏率民拒守城陷被執宏七日不食罵不

絕口而死崇祀鄉賢

明

高德撫甯人洪武初歸附從征累立戰功除授副千戶

十四年奉調征雲南金齒衛等處所至奏績十五年八月進攻阿白寨奮擊力戰死之雲南平詔封明威將軍都指揮使世襲指揮僉事

李光啟樂亭人其先李卜當洪武閒戍陝西平魯衛後有功陞百戶世襲光啟性忠孝有才幹累陞京營都指揮使贈其先爲鎮國將軍歸祭先塋爲樹碑給族人衣食陞宣鎮葛峪參將嘉靖丙戌敵數突入侵苦居人啟憤焉一日警至率所部兵疾馳圖殲之未及爲陣敵四至大呼殺入啟被縛去困飢不得死因給敵曰我爲帥第引我亭障下當有贖者敵果引至亭

永平府志

卷六十五列傳

忠烈

二

障下啟罵曰爾宜殺我我非不肯死慮中國人疑我真降徒負辱國大罪耳誰贖我者敵大怒遂支解之事聞詔立祠春秋祀焉見宣鎮忠烈傳

白毅昌黎人歷功陞錦衣衛都指揮同知以事誣誤調雷州衛指揮同知猺賊入境毅領軍殺賊屢立戰功後於竹叢尾村孤軍抵賊斬獲甚多賊眾幾潰轉被

殺贈本衛指揮使

雷州府志

周建撫甯衛指揮僉事成化十六年管界嶺駐操營事三月鹵入寇參將王宣督令截殺至白石店奪回被擄人畜燒敵車輛回至椴木嶺伏賊突出前賊復回

夾攻戰衄賊欲取建甲衣喝合脫不從猶以刀傷賊臂羣怒爭刃之事聞詔加實授指揮同知世襲

才寬字汝栗遷安人登成化戊戌進士由縣合歷遷河南布政使都察院右副都御史工部侍郎巡撫甘肅轉尚書以不附逆瑾出爲陝西總制好野戰不拘陣略而馭下甚嚴部將怯懦輒恥以巾幗正德己巳值火篩在套率興武營擊之斬首數十級狃勝深入忽伏兵起中流矢卒於陣事聞上爲輟朝哀悼諭祭葬贈太子少保諡襄愍仍廕子世襲錦衣衛百戶崇祀鄉賢寬性坦直曠達不拘小節遇事裁決如流初知

永平府志

卷六十五列傳

忠烈

三

山東商河縣課最知西安淮安二府多異政在西安時有民失金於食店急白寬寬仰見鷹飛又有蜘蛛墜案曰店中必有姓朱名英者得其金詰得其人果出金以給失者至今民謠曰才寬斷朱英事載西安府志子英中宏治甲子舉人官至平定州知州

張世忠字顯甫山海衛人總髮時以世胄育膠庠旋襲副千戶嘉靖丙戌登孫堪榜武進士加授署指揮僉事尋掌衛篆有清幹聲遷秩守備天壽山革中璫斂役諸弊歷陞大同中路參將拒寇丁家莊有斬獲功得實授正千戶緣邊事註誤聽勘回籍未幾西陲告

急兵部疏名上請特命守偏頭關時太原頻年失利人皆指爲危途世忠聞命躍然曰此正吾報國之秋也亟赴之嘉靖二十一年七月敵寇太原世忠與副總兵段堂參將何堂劉維琥遊擊張文懿合五營兵襲之敵血誓相救援至陸支村段堂軍潰文懿等引避世忠麾下僅千人挺身血戰自己至酉後援不至敵且增騎合圍會矢石俱盡世忠憤呼曰我軍被圍諸君背盟不援國憲天刑甯汝道耶復督短兵力戰首中二矢馬已被傷猶跨牆對射一箭透腋而死事聞上憫悼賜祭葬用一品禮贈左都督諡忠愍陸支村山海關俱建祠享祀同時百戶張宣張臣亦死並予卹而堂等論死

永平府志

卷六十五列傳

忠烈

四

陳舜撫甯衛指揮使任黃花鎮守備嘉靖二十五年三月敵入寇舜奮身率輕騎持短兵截戰敵眾我寡死之事聞詔加都指揮僉事

魏琦遷安人庠生嘉靖三十六年兵變琦率鄉人保守兵至琦手刃二人旣而眾兵羣合遂被執琦罵不絕口而死當事大加歎異命有司周恤給葬焉

薛三桂盧龍人萬曆庚子舉人任雲南永甯知州死奢囚之難贈按察僉事

李國梁山海衛指揮體貌豐偉膂力絕倫從將軍杜松
渾河大戰歿於陣以功加陞都督指揮僉事

高如崧東勝衛千戶萬厯中任石門路千總時泰甯寇
花場峪佯令數騎討戰主將輕出敵伏起陷圍如崧
奮勇力鬪出入陣中者三敵攢射落馬剖其心而死
事聞贈加二級世襲指揮同知

李國棟山海衛指揮萬厯間從杜松出塞與我 大清
兵戰於渾河陣歿以功贈都指揮僉事子鳴岡襲廕
穆齊元臨榆人應役於石門路從參將陳愚聞在范桑
峪口外陣亡

永平府志

卷六十五列傳

忠烈

五

邊萬里山海衛百戶以都司管中軍事崇正己巳入衛
京師行至薊州五里橋敵兵掩至據橋大戰自未至
酉身被重創力戰死

焦慶延盧龍衛人由世胄任居庸參將操守廉介居官
嘗賣田自給事母極孝兵備道張春恆稱之曰武將
若慶延何愁不得將士心耶厯任三屯副總兵稱廉
孝將軍崇正庚午慶延閒住適敵至戰死陣間贈光
祿大夫驃騎將軍祀武廟表忠祠

韓原洞字開之盧龍人少爲諸生詩文有奇氣當郊原
多故嘗慷慨悲歌慕古人以身殉國之義崇正庚午

力捍危城出金犒師知不可支乃爲忠國論置懷中
赴鬪而死同時中書舍人廖汝欽守奎樓死汝甯通
判楊爾俊城陷不屈死忠武營千總牛星耀仇耀光
殺敵陣亡千總石可玩城陷闔室自焚庠生周祚新
城陷視妻與子女先縊乃自縊死遣火焚宅千總張
學閔胡承祚城陷戰死堞閒胡登龍城破攜子生員
光奎並男婦投火中死生員羅世傑有弟三人曰竣
曰塚曰圻一人守家三人守城城陷皆死於戰守家
者亦自殺庠生田種玉及子福元城陷闔宅自焚其
姪士雋城將陷赴戰死於東城上千總梁壯威奮勇

永平府志

卷六十五列傳

忠烈

六

臨敵射不虛發會矢盡持短兵接戰死亂兵中庠生
李光春丁應掄李文燦胡起鴻劉可足武生張鴻鸞
醫官陸橘郡民李應陽張俊郭重光張宗仁張尙義
李大敬張禮傳守望俱盧龍人死庚午之變祀表忠
祠外如卜小峯城守千總房應祥城守中軍俱戰死
張國翰東勝左衛指揮僉事歷任營衛有聲庚午府城
陷從容酌酒俾其子逃同妻韓氏縊死詔建祠旌表
陳靖華東勝左衛指揮使掌永平衛印興屯利國撫綏
有方庚午之變守東城死於難長子君錫由貢生任
淮安府睢甯縣知縣次子君任陝西總督內司遊擊

馮繼京永平衛人庠生厚重端方能詩文善騎射稱文
武才庚午城陷自縊人救免之叱曰偷生吾不忍爲
夜復縊而死弟聯京短小精悍守城有膽氣戒眾勿
退及持戟衝敵連刺三人因大隊先登死於陣間兄
弟並祀表忠祠

韓原性盧龍人廩生有學行喜獎拔後進千里之內負
笈從遊者甚眾庚午守榛子鎮不屈死

呂鳴雲山海衛人孝廉鳴夏之弟武健才勇以守備爲
揚武營中軍庚午守郡城戰死追贈遊擊將軍

楊開泰山海衛百戶郡城失守泰以本路把總率兵偵
探至榆關西遇敵對射死之

永平府志

卷六十五列傳

忠烈

七

楊廷棟山海衛百戶少以勇力稱爲揚武營千總郡城
破奮擊死之

張汝恭灤州人廩生庚午州城陷死難祀表忠祠

高應見遷安人庚午兵變飲毒而死督撫彙題旌表

蔡國勳山海衛千戶率兵恢復遵化偵探遇敵奮勇直
前戰沒於陣閣部孫承宗題卹贈指揮僉事

嚴大寬山海衛千戶從總兵趙率教應敵遵化中途遇
敵眾潰力戰不退死之

拽梯郎君昌黎人失其姓名顧炎武有記詳祠宇門同

時周昌會李崇樂張三張守霜劉極楊狗子鄭應秋
邛小月洪保兒馬九哥孟之奎張福兒孫鳴海王六
于守道趙世祥高聲駿卜云吉郭來貴張友貴龔自
學鍾五兒李蕃枝單應武朱可昌梁民樂于守通梁
世文王六兒劉君福孫三孫來哥王國臣李思謙張
六指郭得哥王大才翟三周德純齊福並昌黎人崇
正庚午守城死事巡撫楊嗣昌檄縣刊石豎碑有司
春秋致祭今祀於忠義祠

馮運隆字翊明灤州人由明經任河間府訓導壬午冬
流寇至隆守陴力戰城陷不屈死

永平府志

卷六十五列傳

忠烈

八

王肇桓興州右屯衛人中軍都督府都督同知崇正末
年遭寇亂闔門墜井死

楊呈芳字桂林山海衛人生而穎異敦謹孝友崇正十
年由貢生宰河南魯山縣勤政愛民一時有慈父母
稱明季盜賊蠡起十二年秋修書院完城郭練勇設
卡爲守禦資十三年土匪詹思鸞爲亂呈芳與千總
李一鳴謀斬之十五年士兵復亂呈芳登南城撫禦
思鸞餘黨乘閒賊之邑大亂僕吏逃散士民哀殮浮
厝縣廨事聞贈汝州知州銜入祀名宦門人並立專
祠以祀私諡忠愍歿後城陷於寇而明社遂墟

案

欽定勝朝殉節諸臣錄呈芳得謚節愍

國朝定鼎子孫始得迎柩歸

啟視面猶如生道光八年長白榮譽公宰是邑拓修

舊祠勒碑紀莅官死事之顛末十八年其邑進士許

公夢蘭令於撫訪其後裔登堂拜像書聯額懸於家

祠並揭榮公碑文俾載家乘後人始知其政績殉難

之詳

案明史呈芳附李貞佐傳練總詹思鸞與進士宗麟祥等謀不軌呈芳捕斬之城陷死

魯山縣楊公祠碑文云楊公祠祀明邑令桂林楊公

也公山海衛人諱呈芳桂林其字也崇正十年秋由

貢生來治斯邑廉幹有為視民如子凡民所不便及

所欲而未遂者罷之行之不俟終日一時有慈父之

稱焉顧時方多難寇盜充斥而流賊復往來蹂躪居

民惴惴欲逃公乃為購弓矢鑄兵器召募豪勇朝夕

訓練視要隘設卡俾村寨各為犄角互相救援儆戒

備至賊不敢犯既復念城垣頽圯不堪守禦十二年

永平府志

卷六十五列傳

忠烈

九

秋七月乃下令曰邑之有城所以壯觀瞻而資保障
頽廢若此何以固吾圉乎願相與修之者聽於是
力者輸力有財者輸財畚鍤雲集揀度潮興登登之
聲聞數十里不半載而金湯屹若矣明年修葺學宮
絃誦有所夏四月復增築元紫芝琴堂購屋三楹以
資吟眺暇輒出郊勞農或集諸士子課文講學教之
以孝弟忠信民大悅服是年六月練總詹思鸞等為
亂距城跋扈挾以求撫公陽許之謀其懈密令干總
李一鳴擒殺之民賴以安越二年土兵復為亂焚掠
殺害殆甚思鸞公亟登南城赴之賊眾方猶豫會有
思鸞餘黨竄迹其中遂為所害時壬午四月十日也
嗚呼公遇害七月餘而城為流賊所陷明年再陷又
明年天下土崩而明之社稷亦不血食矣悲夫邑故
有祠其剏建之由來不可考意邑民感公遺愛而為
之也顧祠宇卑陋且歲久將傾余欽公之捍患固圉
戡暴安民於兵革擾攘之餘而能振興學校撫前賢
遺迹而仰慕增築之卒之慷慨乘城以身死職雖古
之緩帶輕裘單騎見回紇者何以加諸但其間有幸
不幸耳爰捐資鳩工撤其舊以新之而加峻焉並於
春秋仲月具一少牢以祭焉或曰公已嘗祀於名宦

春秋之祭罔闕子之爲是不亦贅乎余曰不然名宦者國家旌賢之典也專祠者庶民懷德之誠也余之爲是者亦以公之慈惠忠毅實足爲我輩後來者之矜式也况此祠創建有年不修則廢記曰有其舉之莫敢廢也新之所以懼其廢也贅乎哉是役也始丙戌季秋越一月告成

王際明字清庵號泰寰撫甯人歲貢生崇正閒授廣平府訓導才德優長以卓異薦陞陝西沔縣知縣莅任未兩月流寇乘夜襲城明執大綱率家丁士民奮勇巷戰賊知不可奪黎明退出城池倉庫俱無恙獄中老囚猶不忍逃曰不敢以此累賢侯也頭帶重傷身中數十矢米漿不入口者數日具報部院洪承疇特疏題奏賊積恨不平復糾眾圍攻五十餘日不下將

永平府志

卷六十五列傳

忠烈

十

軍祖大器救兵飛集殺賊數千地方稍安城頭立有王侯血戰碑自是勉強供職舊傷不時作發屢乞休遲之三年方許歸百姓愛戴流涕不絕從之二百里而後返由湖廣買舟東下因其子之葵任徐州河糧廳攝刺史事遂至徐回抵德州我王師勦賊已入山東界不得已退還臨清依前任撫令王臺家未幾清兵入城賊潰喊聲四起明仰天歎曰臣受恩不淺生無以報惟一死以報君耳遂登樓舉火自焚我朝李總戎憫其忠而殮之厥後山左撫按交章入告部覆方下闖賊已陷京師未沾卹典

王之心字鑑吾灤州人司禮監太監博學精翰墨監督
薊永力杜餽遺免文吏庭謁崇正甲申都城陷心同
御馬監太監王承恩侍帝縊於煤山一時稱兩中貴
殉義心弟之仁任蘇州總兵順治二年率所部入海
見事不成復登岸詣督師洪承疇請死曰某海中自
裁人未我知特來求明白死耳從容就刑可謂兄弟
合節矣

程繼賢號敬庵山海衛人由貢監初授中書舍人歷尙
寶司卿封朝議大夫賢事親不諉諸兄父百歲具奏
建坊完兄產撫兄子時以孝弟稱且敦篤友誼生死

永平府志

卷六十五列傳

忠烈

士

不渝請除催頭之弊功在梓里年踰七旬居鄉謙抑
甲申守官都門不臣逆闖捶幾死僑寓天津土寇起
不屈遇害 國朝順治庚子本衛士民公請入祀鄉
賢

李友松字赤仙山海衛人庠生性剛毅有學識崇正甲
申春流寇薄城勢甚危急松慷慨倡義率庠生高輪
穀譚邃寰劉泰臨鄉耆劉臺山黃鎮庵赴營說賊緩
軍遂遇害然城卒賴以完 國朝錄功廕子棲鳳爲

貴州思州府經歷

臨榆程儒珍關門舉義諸公記云珍嘗聞之父老
國初關門舉義時鄉先生八人實爲之倡至今稱八

大家云入家者李譚高劉曹程馮呂也然考當時共
事者實十有一人蓋八人外尚有奈劉黃三先生焉
閱縣志僅李赤仙高輪轂有傳奈公雖有傳而未及
舉義事李赤仙傳中雖敘譚劉四人而馮呂曹三公
及珍九世伯祖印古公無聞焉憶幼時檢書舊篋得
奈潛滄述舊作五首哭李赤仙二首及諸公上墨勒
王揭紙雖朽蠹而字猶可辨載當時原委甚悉崇正
甲申四月吳三桂奉詔入援兵五萬人號稱十五萬
進至玉田聞京師已失旋兵山海未有決策旋得父
驤手書有降志已而以愛妾陳圓圓故拔劍砍案決
意抗賊召邑中紳士與議諸公復以大義勸之於是
南郊閱兵凡一切措餉城守事宜眾慨然任之歃血
訂盟遣人東乞 王師謹案 皇清開國方略
乞師者為孫文煥郭雲龍又三桂有上睿親王啟茲
不具錄又遣人給賊緩師給賊者為李赤仙譚遂寰
高輪轂劉克望四庠生劉臺山黃鎮庵二鄉者行至
三河遇賊遂羈於軍四月廿一日賊至山海營於石
河之西游騎至城下城中兵出與戰賊鋒頗挫是日
敏程印古馮祥聘呂鳴章其一則舉人奈一元也見

永平府志

卷六十五列傳

忠烈

三

墨勒王賜坐賜茶款接溫謫借范文肅公文程入城
曉諭軍民人心益奮明日清晨 王師從一片石
入賊偵知迎戰三桂兵亦從城出夾攻城守者遙助
聲勢謹案 皇清開國方略賊將唐通率百餘人
出一片石我軍擊敗之李自成結陣自北山至海我
軍寡錯綜布陣是日大風煙塵障天我軍呼噪者再
風頓止從陣尾擊賊無不以一當百遂大敗之先是
墨勒王命三桂兵以白布纏肩為誌兩軍協力賊不
能支賊馬步二十萬胥敗走我軍七戰七捷賊棄輜
重奔殺吳驤於范家店給賊者惟高選乘間出走賊
追之被創遇大軍得全餘皆遇害此當時諸公之事
亦關門創建以來一大舉也乃功績攸同而顯晦有
異豈以說賊難而乞師易歟然秦庭之哭卒報深仇
魯連之謀終成偉績逆闖自猖獗以來未有若斯之
大齟者是雖 皇朝應運而興而闔邑之所
以保全諸公蓋皆與有勞矣是烏可以不記

國朝

呂鳴夏字九三山海衛人明萬曆乙卯舉人天性孝友

弟鳴雲歿於王事遺孤幼稚撫訓成立輿論重之初仕清豐教諭繼補東鹿訓課有方陞真定郡丞分駐宣鎮以抗直取忤挂冠歸里明末賊逼關門夏家居佐義殲寇我朝定鼎錄功補衛輝郡守時天下初定撫安百姓政績稱最擢僉憲備兵固原值降將武大定等謀叛以兵脅夏不少屈歷數其罪罵不絕口遂遇害事聞勅賜祭葬贈光祿卿廕入祀鄉賢

王可就字向明灤州人以將材任山東撫標遊擊勦巨盜王進周撥宣等又撫賊張正等數萬人以功陞延安府參將值逆賊謝化奇等作亂設計勦平陞慶陽

永平府志

卷六十五列傳

忠烈

三

府東協副將閣部洪經略題調恢復雲貴鎮守偏橋其地有諸葛洞者江中多怪石舟楫不能通軍需皆民丁負運因召父老叩狀僉曰中有巨石高數丈石下有洞讖云若要此洞開除非諸葛來自昔畏難輒止就慨然力任募石工勇慧者鑿之巨石下得一碣有丁口京邊九十公之語乃武侯筆隱就名於中眾皆踴躍數旬成工土人勒石記之以功陞杭州城守副將先是杭多猾賊賄通當道不肖者復左袒賊就與賊唐起凡戰敗之兵道某反謂誤入平民爲盜因與抗論事白督撫遂專任就起凡密遣賄說就不出

戰願代爲夤緣得總戎就怒曰 賊視我爲何如人
哉誓必滅此朝食於是元旦會兵圍其砦親登手刃
之餘黨降起凡兵稱百萬爲杭害者幾二十年至是
始平 上嘉其功加陞榮祿大夫署都督同知

賜蟒玉

封三代任杭時總督被江賊劫所佩

刀急召與議就獻策阻塞沿江便路置塘戍守率兵
嚴捕江賊遂平尋陞福建副總兵以都督同知署總
督標下中營事詣 闕陞見 上親臨試射授雲
南臨元澂江等處總兵官時吳逆變作復 召見

賜綵段二表裏

論曰可速回閩密察耿藩恐效

永平府志

卷六十五列傳

忠烈

西

尤吳逆也遂星馳踰仙霞嶺尙不知耿逆之變逆密
遣四僞官要於途日夜嚴防不容死旣至圖乘閒誅
逆謀洩迫趨都尉府度不能免仰天歎曰大丈夫不
能爲國除賊夫復何言舉家號泣隨之不顧遂遇害
年六十二 上憫其忠 賜祭廕二子長應麟
任榮昌令次應薦性至孝以母老不仕居鄉任義周
恤於就沒後四年卒

馬維熙字天御山海衛人拔貢生順治三年錄功授忻
州同知署偏關西糧廳篆值姜瓖之變山右一帶搖
動偏關闔城皆從逆熙獨不屈乃囚之別所遣人守

伺久之守義愈堅遂加害事聞贈忻州知州

張師聖遷安人讀書善騎射以將才任金吾守備陞靖海參將簡練軍士整飭防汛數年海上肅清順治中陞山東登州副總兵未離任海寇旋發督撫令將兵進討歿於陣

劉良臣字心伯永平衛世襲以軍功授遊擊勦平流寇歷陞甘肅總兵挂平羌將軍印卒於陣贈右都督進光祿大夫子澤洪總兵襲廕

崔尙樸盧龍人庠生被俘至遼改姓名李嘉賓應試復入庠國初授新蔡令清廉慈愛邑人尸祝之陞南

永平府志

卷六十五列傳

忠烈

五

康郡守遇金王之變鳩眾堅守城守備內叛遂被執罵賊求死不得偕配吳氏投繯死事定議贈廕惜無子

李雲起昌黎人順治三年以進士知黎城縣姜逆之變大兵南下賊崩潰而土寇趙聯芳胡尙文煽亂雲起

死焉

山西通志

惠應詔字如綸撫甯人明季由武舉任薊遼督標副將順治元年英王略地西徇應詔首先歸誠二年正月招降延甯甘固諸營堡嗣因西安省會要地留守重任督撫合疏請副將管城守事西安游經寇禍軍實

久虛芻糧器械焚棄殆盡應詔視事閱月壁壘一新
又闖賊所掠子女露宿風棲啼號徧野應詔收問鄉
貫行移郡縣俾得各歸桑梓遠近歡聲如雷是年冬
賀珍餘孽復熾圍西安應詔悉力固守三年正月率
兵擊賊城下大敗之賊始遁尋陞成都總兵官以收
潼川綿州累功授二等阿達哈哈番世襲五次應詔
中傷身故於順治十八年三月十五日 詔將親
男惠占春仍襲二等阿達哈哈番再準襲四次

王進忠山海衛人康熙初襄陽前營遊擊勦西山賊遇

伏死之

湖廣通志

永平府志

卷六十五列傳

忠烈

六

陳柱國盧龍人康熙十一年任樂亭駐防把總盜伺縣
尹公出詐爲行客入城肆劫柱國挺身與鬪中流矢
被獲縛令導引柱國裂眦厲罵遂遇害事聞 詔
賜銀百兩襄葬事

張朝臣字鼎望山海衛人以武進士任左衛守備初柴
溝有 皇姑退還莊地接壤左衛之城南是時內務
府遣官圈收復給旗丁覬衛南膏腴欲併圈佔朝臣
固爭得免衛人立碑頌之陞浙江處州協都司康熙
四十七年遂昌縣土賊作亂臣率兵赴勦至大拓崖
高路窄僅容一騎臣不避危險奮勇身先殺賊被創

死

詔贈都司僉事加一級賜祭葬廕一子衛干

總

許永忠撫甯人武舉歷任都司康熙三十六年從征噶爾丹戰歿於陣照遊擊例
賜卹世襲雲騎尉無子爵除

劉天錫昌黎人乾隆丁未科武進士任河南河北鎮懷慶府中軍守備以軍功陞授行營都司從征湖北當陽縣雙溝力戰陣亡子孫世襲

張敬一昌黎人乾隆甲辰武進士三等侍衛原任慶遠協標中營都司楚猺爲逆竭力攻勦於界石岡調陞

永平府志

卷六十五列傳

忠烈

七

廣西提標前營遊擊奮力勦賊歿於鳳凰坡子孫世襲

倪鵬臨榆人試用四川縣丞金川之役借補按察司照磨隨營運餉乾隆三十八年春定邊將軍溫福由攻喝爾拉入兵以賊扼險不得進別取道攻昔嶺駐營於木果木令提督董天弼分屯底木達以偵賊六月索諾木陰遣小金川頭人七圖安堵爾出美臥溝煽故番之降我者先攻天弼戕之自山後來擾木果木劫礮局斷水道運糧夫爭避入大營聲如沸紛且亂營中兵遂潰溫福以親兵百人搏戰力不敵被害提

督馬全牛天昇亦戰死鵬隨一書吏遇賊賊刃之無完膚吏亦被創僞死賊既去吏割其辮髮懷之是役也文武殉難者數十人悉與建祠鵬 贈鑾儀衛

經歷

計宏謨臨榆人乾隆丙子丁丑連捷武進士任山西大同府陽和營都司陞授湖北竹山營遊擊從阿將軍征金川歿於陣

董甯川撫甯人乾隆甲午科武舉初充兵部差官乾隆四十九年陞貴州鎮遠鎮守備五十三年陞湖北襄陽鎮前營都司六十年出征湖南旋陞永州右營遊

永平府志

卷六十五列傳

忠烈

六

擊嘉慶三年陞興國營參將四年四月二十一日在竹溪縣桐梓埡與賊戰歿於陣世襲雲騎尉子官保歷署湯泉營石門路蒲河營都司孫長生護理山永協副將

吳一鳴灤州人原任山東曹州營守備出征死節世襲雲騎尉

溫振賢樂亭人由行伍補倂城汛經制外委嘉慶元年奉派出師勦川湖教匪至三年三月初十日在川與賊戰直衝其鋒被執不屈支解死事 聞議卹時同殉難者有參遊官部議參遊世襲雲騎尉振賢世

襲恩騎尉奉

硃批云官雖大小不同而以義就

死則一也著俱世襲雲騎尉三世恩騎尉罔替崇祀忠義祠孫如璋官四塘口守備同治七年正月山陝賊竄入畿輔如璋被害

魏亨達昌黎人元煜子嘉慶己卯科舉人江甯府知府助餉加道銜 賞戴花翎髮逆犯境城陷以身殉

咸豐四年

賜卹贈太僕寺卿世襲雲騎尉三世

恩騎尉罔替

甯曾綸字理堂樂亭人蘭森子道光庚子進士任工部主事咸豐四年陞員外擢郎中尋授山西道監察御

永平府志

卷六十五列傳

忠烈

五

史奏言世祿之家鮮克由禮雖有雋才終歸敗德臣近見內外大臣子弟率多俊秀聰明乃繩尺稍懈習染漸深始則觀劇羣飲繼則挾妓狎優甚至聚賭跑車日流邪僻雖曰引誘有徒實以陶成無術况在大臣子弟有差使者居多數年之後或薦擢顯要或簡授地方儻積習未除驟膺重寄以蕩檢踰閑之人而望其表率屬員肩任繁鉅勢必不能請 特諭內外滿漢大臣於其子弟之未登仕版者爲之延請名師引進善類以騎射文藝爲先以禮義廉恥爲重其已入仕版者尤宜閑出入慎交遊庶漸摩久而德業

成約束嚴而人材出疏入因未確指何人傳

旨

申飭五年九月轉禮科給事中六年二月授四川東道八月丁母憂八年服闋九年補福建督糧道尋陞江蘇按察使改浙江按察使十年十一月粵匪陷城自經死杭人於其殉難之所鑄石以紀其事同治元年奉旨議恤並入祀浙省昭忠祠予諡義烈賞騎都尉世職以恩騎尉罔替

石均字竹生灤州人任貴州都勻府知府咸豐七年七月十七日到官八月朔苗匪作亂城陷罵賊而死時長子鏊在省得凶問往尋父屍不得數日遇更夫指

永平府志

卷六十五列傳

忠烈

三

示曰鼓樓之旁蘆席蓋屍者是乎啓視之體無完膚左手失四指口無舌惟面目如生鏊曰此真吾父也遂痛哭用棺承斂先是均授朗岱廳同知苗困城三月均率眾晝夜登陴防守隨攻隨修城內食盡勢甚急適有參將某帶兵過境賊疑援至圍始解巡撫以守城功保舉知府卽委署都勻謂之曰都勻衝要之地苗破城屢矣非君不勝其任均因無兵力辭不允均遂託眷屬於巡撫慨然去不閱月而殉難

王保庸字寶符號湘舟臨榆人咸豐元年以增生授江西吉安府通判時粵匪擾荆南二年春抵任奉檄防

堵蓮花廳永新縣等隘秋九月賊由長沙東竄茶陵
攸縣皆擾蓮永人心搖動保庸統漕標兵二百名合
鄉團先於城隍界九路衝各隘口分施守禦自率兵
勇西至楚界勘地勢據險置防還駐蓮花廳將西陲
形勢及屯札守禦方略詳稟上臺吉南道周玉衡稱
之曰得此人守蓮永江右之圍固矣保庸精悍多力
能謀善斷玉衡既知人善任乃益自淬勵修器械嚴
號令賊不敢逼遂北竄岳州此卽下長江據金陵之
賊也三年春正月吉屬解嚴保庸旋署秋七月泰和
土匪由安福撲吉知府王本梧銳欲戰保庸謂宜固

永平府志

卷六十五列傳

忠烈

三

守觀釁然後擊之本梧不聽歿於陣保庸遂奉檄權
府事且戰且守八月朔圍解 賞戴藍翎先是吉守
戰歿賊揭竿懸首薄城眾惶懼保庸以重賞購勇士
歸其元續檀爲身歿之痛哭誓師人心始固身不釋
甲者二十餘日卒保危城解圍後復練義勇設保衛
局於城外十月回本任仍統保衛局如故五年八月
粵匪由湖南竄入永新逼安福吉城戒嚴周玉衡統
兵進勦賊逸而西十月復東陷袁臨二郡南逼吉安
十一月二十日遂圍城時玉衡已陞臬司督帥員弁
力守待援保庸守永豐門調保衛局義勇入城率募

友家丁登埤時城中器用多缺夜無油燭人持械立暗中十二月初八日西月城陷於地雷賊蜂擁入保庸力戰卻之卽時修補完固論功以同知用時賊據臨江省垣隔絕求援十八次不至六年正月二十五日賊乘連日大雪暗穿地道毀城西南隅突入保庸持短兵巷戰左右跳盪殺數十人飛血濺面力屈被執罵賊死幕友張滋程虎炳家丁譚鶴齡王福王文貴皆死張滋撫甯人增生程虎炳臨榆人俱與保庸善邀之入幕滋辦團練守城有功以訓導用旣復保舉知縣保庸以滋有老母勸之回籍滋曰忠孝不能

兩全且兄旣誓死弟焉忍生虎炳帶保衛局練勇屢有戰功保薦從九品城陷自臬司以下文武官殉者四十人滋時年四十五不能得其屍事 聞保庸以同知 賜恤給雲騎尉世職祀吉安昭忠祠及本籍忠孝祠滋虎炳并世襲雲騎尉

劉福林遷安人候補縣丞以軍功賞戴藍翎加同知銜卽補知縣需次江蘇咸豐八年七月二十六日在浙江嚴州府開化縣帶勇防勦遇賊接仗力戰陣亡

聶邦鈞撫甯人咸豐二年隨蒲河營都司出師五月至懷慶府防堵髮逆亡於陣

齊廣立昌黎人道光丁酉科武舉歷任白沙嶺通永鎮千總咸豐三年在河南懷慶府陣亡世襲雲騎尉以恩騎尉罔替是年盧龍守兵王閏王永祿於三月初十日在揚州西門外陣亡盧龍守兵田時雨於十一月十七日在揚州東三河尖與賊接仗右脇受槍傷死

朱啓順昌黎人以軍功授古北口提標中營千總後禦寇瓜州陣亡

譚光斗臨榆人武生補山永協頭司額外外委咸豐二年隨征揚州長髮賊三年春攻揚城左股中槍傷陞

永平府志

卷六十五列傳

忠烈

三

補經制理把總事十一月十六日隨提督陳金綬分路截剿瓜州賊是日風沙迷日本營都司葉舒青被圍救援不克隨葉舒青等亡於陣 贈千總銜世襲雲騎尉以恩騎尉罔替

陶景武董萬陞俱盧龍人從征髮逆咸豐三年賊踞懷慶景武萬陞均任經制外委自告奮勇於六月二十一日首登木城大隊在後賊已開門遁矣而大隊忽撤賊見之遂回景武萬陞急退甫及地而賊麇至大呼跳盪殺賊數十景武砍黃巾者一人落馬而賊自後橫砍之萬陞亦力盡遂於丹河鋪西被害俱世襲

雲騎尉以恩騎尉罔替時盧龍馬兵李萬全張文明甯瑾守兵楊逢喜李占元王宗靈翁振鐸李運明唐國柱韓之義郝聲揚名朱明張富有灤州守兵方德韓煥明俱同日死

路印章字綬若遷安人由行伍任太平寨千總咸豐四年隨勝帥防堵臨清州歿於陣 詔贈守禦所銜建

立專祠 予雲騎尉世職

馬東屏盧龍人以武生入營善騎射邑之操決拾者多從之遊見賞於向軍門拔爲經制外委咸豐二年署甯海城把總隨征軍營約束卒伍不遵者以理婉諭

永平府志

卷六十五列傳

忠烈

三

之兼及果報卒多感化歷征直隸山西河南等處身經數十戰及連鎮奏捷以得勝兵往征湖北咸豐五年七月初五日賊劫營東屏持弓矢登壘禦之賊皆應弦而倒矢盡執長刀接戰於稻田中爲泥淖所陷遂遇害事 聞以千總賜恤世襲雲騎尉加一騎校尉是年盧龍守兵盛林於正月十八日在高唐州施放地雷亡於陣

溫福順盧龍守兵咸豐六年九月初一日在廟集西之七星橋陣亡時灤州守兵趙勳於十一月初三日在鄰還集陣亡

張建功遷安人任喜峰路榆木嶺把總咸豐六年十月
隨赴景州勦賊七年四月調潁州於阜陽縣高家堰
陣亡世襲雲騎尉是年□□守兵董天柱王德富於
四月二十五日在江南方家集陣亡盧龍守兵王模
於八月二十二日在江南五里鋪陣亡

陳永春字泰和昌黎人性孝友肝膽過人幼務農兼習
拳勇嘗謂其伯兄曰男兒一生當縱橫四方爲國家
出力一鋤一犁何日有發迹時兄聞言奇之由是不
專責以農業凡遇武藝超羣者必延至家豐其飲膳
永春因得傾心領受不數歲而諸藝皆精年二十有

永平府志

卷六十五列傳

忠烈

三

八會同邑韓超爲貴州巡撫因跋涉萬里仗劍從之
超奇其志甚喜未幾超解職亦隨之歸超轉薦於直
臬李公鶴年麾下爲勇士同治三年敘軍功授把總
職 賞藍翎四年授千總是年李公陞河南巡撫春
隨從管帶精銳營親兵六年改營號驤武左營春充
馬隊營官轄五哨軍馬時捻匪紛擾春由省至許昌
堵禦五月與賊戰屢有斬獲追賊至山東兵屯運河
東岸所過泰安東平兗州三府俱秋毫無犯士民感
戴送大旗二柄上書忠君佑民萬姓感恩八字十二
月拔營追賊至直隸界身先士卒連日得勝七年敘

軍功加都司銜以守備卽補春屢受國恩力圖報効
自正月追賊至三月打仗無算四月至山東高唐州
雙廟力戰陣亡年三十四事
聞加遊擊銜世襲
雲騎尉以恩騎尉罔替

彩呈瑞樂亭人從征髮逆 賞戴藍翎儘先補用外委

咸豐八年八月初一日在江南宿州黃家水寨陣亡

予世職時有盧龍守兵董會陞同日死

童梁盧龍人馬兵咸豐九年十二月十八日在江南宿
州丁家圩陣亡

劉玉昇昌黎人道光丙午科武舉授北塘營把總咸豐

永平府志

卷六十五列傳

忠烈

三

十年在女兒寺禦寇陣亡世襲雲騎尉祀忠義嗣

劉攀梅灤州人經制外委在貴州陣亡世襲雲騎尉

